

# Jahresbricht vo der Trachtegruppe Gurzele 2021

Leider het das Trachtegruppejahr 2021 mit Corona-Ferien agfange.

Mir hi gar nüt dörfe mache, nid Singe, nid Tanze kei HV, ke Autersheimuftritt u kes Trachte z Morge!

Im Februar isch Daniela Hadorn schriftlich gehrt worde für 25 Jahr Mitglied bim BKJV

. Mir gratuliere no mau ganz härzlech.

Am 7. Apriu het sich der Vorstang zur erschte Sitzig troffe.

Mir hi beschlosse am Verein vorzuschlah d HV schriftlech düre zführe ufne ganz eifachi Art mit eme Vorprotokoll.

Das isch zerschmau gsi im Vereinsläbe, dass me d HV nid het chönne normau düreführe.

Dä Vorschlag isch guet gheisse worde!

Der Verein het d Agnes Zenger wieder dörfe i z Chörli ufnäh.

Es isch aus e so wie mirs vorgschlage hi agnoh worde.

O das mir z OK vom Gürbetaler Jodlerträffe uflöse u d Organisation i Vorstand zrügk näh, da d Corona Situation nach wie vor ungwüss isch.

Am 12. April isch üses Ehremitglied d Lisabeth Fankhauser 75. Jährig worde.

Mir hi leider o nid chönne ga singe aber wenigstens es Blüemli ga bringe hi mir dörfe.



O ds Vreni Brönnimann üses Ehremitglied vo der Tanzgruppe isch am 19. Juni 75. jährig worde.

O am Vreni hi mir dörfe es Blüemli bringe.

Am 21. Juni si Barbara u i a d Delegierteversammlung vom Gürbetaler Jodlerverein uf Wattenwil.

Mir hi dert bekannt gäh das mir z Jodlerträfle im Septämber wes chli mügliche isch ufne eifachi Art wete düreführe.

Nach der DV hets vom Jodlerklub Wattenwil es richtig z Nacht gäh.

Es het denn aber o der ganz Abe starch Gwitteret u vieu Schädle gäh i der Umgäbig.

Der 1. Juli isch z Datum wo mir vom Verein ändlech wieder mau öpis hi organisiert. Mir si i d Gürbebedi uf Mühlethurne ga Brätle. Das isch e schöne Abe gsi wo aune het guet ta.

Vom 7. Juli a hi mir wieder gschtartet mit de Singprobe. Mir si zur Barbara Hänni ufe Buurebetrieb ine Schopf ga singe das es weniger gfährlech isch gsi aus im MZG.

Vom 11. Ugschte a si mir du wieder itz MZG ga üebe.

Am 11. u 12. Septämber isch jetz auso z Wucheänd vom Jodlerträffe gsi.

Der ganz Samschi het me vorbereitet. Zäut ufgschteut mit Hieuf vo der Musig Gurzele, das mir d Feschtwirtschaft hi chönne dusse ha, dekoriere im Zäut u i der Chiuche wo d Vortäg si gsi.

Parkplatz iteile mit Bänger, Wägwisser ufsteue, Asinglokau parat mache usw.

Ds Jodlerträffe het am Sunntigmorge am 9:00 mit eme churze Gottesdienscht vom Martin Kaltenrieder gschtartet wo mir vom Chörli o zwü Lieder hi dörfe Singe. Das isch e guete Start gsi.

Am 10:00 het z Träffe du agfange mit üsne zwe Vorträg.

Es isch schön gsi hi fasch aui Klubs vo der Vereinigung mitgmacht.

I der Mittagspouse hi mir di Gescht mit Steak oder Bratwurst u Pommes verchöschiget. Das het super klappt dank der Barbara Hänni u de Häufer vom Männerchor.

Zum Dessär oder später zum Zvieri hets no feini Turte u Cake gäh wo üsi Mitglieder bache hi.

Wo du d Vorträg si fertig gsi het der Gsammtchor ufem Rase bi der Turnhaue der würdig Schlusspunkt gmacht.

Mir hi es rise grosses Glück gha mit däm wunderbare Herbsttag. Es hi sich o aui guet a ds Schutzkonzept ghaute wo me het müsse ersteue wäge Corona.

Am Sunntigabe het me o no grad aus wieder schön troche chönne wägruume. O da si d Manne vo der Musig wieder cho häufe.

Aber o üsi Vereinsmitglieder hi vom Afang bis am Schluss mitghuefe. Das isch gäng ganz GROSSARTIG danke vieu mau!

Es isch es wunderbars Jodlerträffe gsi, grad wäge däm ifache Rahme wie mirs hi düregführt. Es brucht igentlech nid meh.

Im Oktober hi mir grad vier nöii Sängerinne i üsne Reihe dörfe begrüesse. D Anina, Verena, Manuela u Elena! Das tuet üser erschte Stimm guet e chli verjüngt zwärde. Schön sit dir bi üs!

Der Ärntedankgottesdienscht am 24. Oktober isch üses nächschte Ziel gsi. O hie hi mir drü Lieder dörfe singe im Gottesdienscht u aschliessend no zwü dusse ufem Parkplatz.

Wieu mir wieder nid hi chönne ga Reise im Septämber het der Vorstand beschlosse es Brätle dürezführe aus MERCI für aui.

Vo Gurzele si mir grad witer ids Forschthuus vo de Bäuþburger.

Peter u Dänu hi gfüret gha das es schön warm isch gsi dinne u dusse isch e schöni Gluet parat gsi für z Fleisch über z tue.

Mir hi no grad gnue Steak vom Jodlerträffe gha.

D Salate hi mir im Höfli z Seftige bschteut u Züpfe het Barbara brunge.

Es feins Dessärbuffet hets natürlech o no gha. Danke vieu mau für d Spände.

Bi schönschtem Herbstwätter hi mir e zfriedene Sunntig zäme verbrunge.

Coronazahle si wieder gäng gschtige u d Vorschrifte wieder stränger worde. Us däm Grund hi mir am 24. November beschlosse wieder ufzhöre mit de Singprobe.

Es het o i däm Jahr keni Ungerhautigsabe, ke Seniorewiehnachte u ke Autjahrshöck gäh.

Der Wiehnachtswäg Heiligenschwendi hätte mir i der Autjahrswuche wöue ga lufe. Wäge schlächtem Wätter isch o das nüt gsi!

So isch das Jahr 2021 wieder z Änd gange u mir hi numme per Poscht chönne schöni Wiehnachte u e guete Rutsch wünsche.

Danke vieu mau liebi Vorstandsmitglieder für die  
grossi Arbeit u Ungerstützig dürs ganze Jahr u  
bsungers bim Jodlerträffe.

Es grosses MERCI o der Sing- u Tanzleitig fürs usharre  
u z mügleschte z mache bi dere usergewöhnleche  
Situation.

Aber o öich liebi Mitglieder danke i ganz härzlech für  
häufe das wo müglech isch gsi dürezführe u fürs  
Verständnis we gäng wieder negativi Brichte cho si.

Im Jänner 2022

Öii Präsidentin

Marianne Reust